

**Sumáriu Kazu**  
**Tribunál Judisiál Primeira Instáncia Baukau**  
**Janeiru 2024**

**Afirmasaun:** Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma laiha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Judisiál Primeira Instáncia Baukau**

**1. Totál kazu ne'ebé JSMP monitoriza: 22<sup>1</sup>**

Artigu	Tipu Kazu	Númeru
Artigu 145 Kódigu Penál (KP) & artigu 2, 3, 35 no 36 Lei Kontra Violénsia Doméstika (LKVD)	Ofensa ba integridade física simples ho natureza Violénsia Doméstika (VD) no tipu ilísitu sira kona-ba violénsia doméstika	6
Artigu 154 KP no artigu 2, 3, 35 no 36 (LKVD) no artigu 2 (1) alinea f no 20 hosi Lei Nú 5/2017	Maus-tratus ba kónjuje no arma brankas	3
Artigu 145 KP, artigu 2, 3, 35 no 36 (LKVD) no artigu 2 (1) alinea f no 20 hosi Lei Nú 5/2017	Ofensa ba integridade física simples no arma brankas	2
Artigu 258 KP	Danu simples	2
Artigu 140 KP	Omisídiu negligente	2
Artigu 23,172,173 KP	Tentativa violasaun seksuál ho agravasaun	1
Artigu 140(1), 207 KP	Omisídiu negligente no kondusaun sein karta	1
Artigu 154 KP, artigu 2, 3, 35 no 36 (LKVD)	Maus-tratus ba kónjuje no arma brankas	1
Artigu 172 KP	Violasaun seksuál	1
Artigu 243 KP	Obstrusaun ba autoridade públiku	1
Artigu 258 KP no artigu 2 (1) alinea f no 20 hosi Lei Nú 5/2017	Danu simples no arma brankas	1
Artigu 306 KP no artigu 303 (1) KP	Uza dokumentu ba identifikasaun alleiu no falsifikasaun ba dokumentu ka notasaun técnica	1
<b>Totál</b>		<b>22</b>

<sup>1</sup> Totál kazu 22 ne'e la representa totál kazu ne'ebé Tribunál Judisiál Primeira Instáncia Baukau julga iha fulan Janeiru 2024

## 2. Totál desizaun ne'ebé JSMP monitoriza: 13

Tipu desizaun	Artigu	Númeru
Pena multa	Artigu 67 KP	6
Suspensaun ba prizaun nia ezekusaun	Artigu 68 KP	4
Pena prizaun	Artigu 66 KP	1
Omologa pedidu dezisténsia keixa	Artigu 262 KPP	1
Absolve		1
<b>Totál</b>		<b>13</b>

## 3. Totál kazu sira ne'ebé adia tuir JSMP nia monitorizasaun : 0

## 4. Totál kazu sira ne'ebé sei kontinua prosesu tuir JSMP nia monitorizasaun: 9

### B. Deskrisaun sumáriu julgamentu ba desizaun kazu sira

#### 1. Krime danu simples

Nú. Prosesu : 0140/20.BCBCV  
Kompozisaun Tribunál : Koletivu  
Juis : Dra. Sribuana da Costa, Dr. José António d. Escurial no Dra. Maria Modesta d. A. Viera  
Prokuradór : Dr. Bartolomeu de Araújo  
Defeza : Dr. Cristovão Nuno Ximenes (advogadu privadu)  
Desizaun : Omologa pedidu dezisténsia keixa

Iha 08 Janeiru 2024, Tribunál Judisiál Primeira Instáncia Baukau prezide julgamentu tentativa konsiliaun ba kazu danu simples ne'ebé envolve arguidu JGP no MEF hasoru lezadu MdJ, iha Aldeia Maukale, Suku Gari-Uai, Postu Administrativu Baukau Vila, Munisípiu Baukau.

#### Akuzasaun Prokuradór

Prokuradór akuza katak iha 30 Novembru 2020, iha oras tuku 16:00 lokraik, arguidu sira oho lezadu nia kuda hamutuk rua no kuda rua ne'e ho kondisaun kabuk. Arguidu sira komete aktu ne'e, tanba kuda sira ne'e tama ba iha arguidu sira nia to'os laran no han estraga hotu arguidu sira nia batar. Arguidu sira nia aktu ne'e hamosu prejuizu ba lezadu ho valor osan hamutuk US\$1,200.00.

Prokuradór akuza arguidu sira kontra artigu 259 (1 alinea b) KP kona-ba danu agravadu ho moldura penál tinan 2 to'o tinan 8.

#### Produsaun ba prova sira

Iha prosesu julgamentu, arguidu sira hili direitu nonook. Entretantu lezadu kontinua konfirma faktu balun katak arguidu sira mak oho duni lezadu nia kuda hamutuk rua no kuda rua ne'e ho kondisaun kabuk maibé lezadu rejeita nia kuda mak ba han arguidu sira nia batar. Lezadu hatután mós katak kuda sira ne'e halai ba mate iha lezadu nia uma no xefe aldeia mak informa ba lezadu katak arguidu sira mak sona

mate kuda sira ne'e uza dima. Lezadu hakarak rezolve problema ne'e maibe ho kriteria arguidu sira presiza selu lezadu nia kuda ne'ebé arguidu sira oho.

Testemuña NF, nu'udar xefe aldeia depoimentu katak lezadu nia kuda tama duni ba iha arguidu sira nia to'os no han estraga batar hun 38 ne'ebé sura ba osan hamutuk US\$10.00. Testemuña hatutan katak arguidu sira oho duni kuda rua no kuda rua ne'e ho kondisaun kabuk. Relasiona ho kuda nia folin, testemuña hateten katak tuir esperénsia kuda ida faan karik ho folin US\$300.00.

### **Alegasaun final**

Prokurador haktuir katak mezmua iha julgamentu arguidu sira hili direitu nonook, maibe prokurador konsidera faktu hotu provadu bazeia ba konfirmasaun lezadu nian no depoimentu hosi testemuña katak arguidu sira mak oho duni lezadu nia kuda sira. Alende ne'e, kuda inan bo'ot rua ne'e ho folin US\$600.00, la inklui kuda oan iha kabun laran. Tanba ne'e, husu ba tribunál atu kondena arguidu sira tuir konviksaun tribunál nian.

Alende ne'e, defeza mos haktuir katak iha produsasaun ba prova arguidu sira hili direitu nonook maibe lezadu konfirma katak arguidu sira mak oho nia kuda, nune'e husu ba tribunál atu kondena arguidu tuir konviksaun tribunál nian.

### **Desizaun**

Depoizde avalia faktu sira hotu, tribunál halo alterasaun ba kualifikasaun jurídiku hosi artigu 259 KP kona-ba danu agravadu ba fali artigu 258 KP kona-ba danu simples, tanba tribunál konsidera faktu ne'ebé provadu mak arguidu sira oho kuda rua la'os haat, nune'e konsidera krime ne'e prenze elementu hosi krime danu simples. Alende ne'e, parte sira rezolve ona kazu ne'e no arguidu sira mos selu ona lezadu nia kuda ho osan hamutuk US\$200.00 ho fahi ida no lezadu rasik hato'o pedidu ba tribunál atu deziste tiha nia keixa hasoru arguidu na'in rua, nune'e bazeia ba pedidu dezisténsia no akordu dame hosi arguidu sira no lezadu, tribunál konklui prosesu ne'e no omologa akordu dame ne'e<sup>2</sup>.

## **2. Krime danu simples no arma brankas**

Nú. Prosesu : 0046/21.LALPL

Kompozisaun Tribunál : Koletivu

Juis : Dra. Sribuana da Costa, Dr. José António d. Escurial no  
Dra. Maria Modesta d. A. Viera

Prokurador : Dr. Bartolomeu de Araújo

Defeza : Dr. António Fernandes

Desizaun : Absolve

Iha 10 Janeiro 2024, Tribunál Judisiál Primeira Instánsia Baukau prezide julgamentu leitura akordaun ba krime danu simples no arma brankas ne'ebé envolve arguidu EdC hasoru lezadu JdC no Estado RDTL, iha Aldeia 30 Agostu, Suku Fuluro, Postu Administrativu Lospalos, Munisípiu Lautein.

---

<sup>2</sup> Tanba kazu ne'e ho natureza krime semi públiku nune'e, tribunál bazeia ba artigu 262 KPP kona-ba tentativa konsiliaun, halo tentativa konsiliaun ba arguidu sira no lezadu.

### **Akuzasaun Prokuradór**

Prokuradór akuza katak iha 16 Janeiru 2021, iha oras tuku 14:00 lokraik, arguidu uza katana taa lezadu nia au hamutuk lolon 53. Au refere lezadu kuda iha nia to'os laran desde tinan 1984. Au refere faan lolon ida ho folin US\$7.50, nune'e total prejuizu hamutuk US\$397.50.

Prokuradór akuza arguidu kontra artigu 258(1) KP kona-ba danu simples ho moldura penál to'o tinan 3 ka multa no kontra mós artigu 20(1), artigu 2(2 alinea f) Lei Arma Brankas.

### **Produsaun ba prova sira**

Iha prosesu julgamentu, arguidu deklara katak arguidu taa duni au refere tanba au refere arguidu hatene tuir hela tanba iha tinan 1984, arguidu foin ho idade tinan 20 hamutuk ho nia aman mak kuda au refere. Depoizde arguidu nia idade tinan 30 mak arguidu nia aman fó hatene ba lezadu nia maun FdG hodi halo karau luhan iha rai refere.

Entretantu, lezadu deklara katak iha tinan 1984, lezadu ho família haree rai refere mamuk nune'e mak lezadu ho nia família ba kuda au iha rai refere la'os kuda iha arguidu nia rai. Antes ne'e, arguidu taa ona au sira ne'e, maibé lezadu la ko'alia buat ruma no bainhira arguidu taa tan au hirak ne'e mak lezadu ba hato'o keixa iha Polísia Eskuadra Lospalos.

Alende ne'e, testemuña MdG nu'udar viziñu depoimentu katak bainhira arguidu taa au refere testemuña iha hela eskola mak haree, nune'e testemuña hasai foto no kontaktu kedas ba lezadu.

### **Alegasaun finál**

Prokuradór haktuir katak iha produsaun ba prova, arguidu deklara katak au refere arguidu nia aman mak kuda no lezadu deklara katak lezadu ho nia família mak kuda, nune'e husu ba tribunál atu kondena arguidu tuir konviksaun tribunál nian.

Enkuantu defeza haktuir katak arguidu taa au refere tanba arguidu hatene tuir katak au refere arguidu hamutuk ho nia aman mak kuda iha momentu arguidu sei idade tinan 20, nune'e defeza konsidera arguidu taa ninia au rasik la'os lezadu nian, tanba ne'e husu ba tribunál atu absolve arguidu hosi prosesu ne'e.

### **Desizaun**

Depoizde avalia faktu sira hotu, tribunál konsidera faktu sira la suficiente hodi prova katak au ne'e arguidu mak na'in ka lezadu nian, nune'e tribunál konklui prosesu ne'e no absolve arguidu hosi prosesu ne'e.

### **3. Krime maus-tratus ba kónjuje no arma brankas**

Nú. Prosesu	: 0099/21.BCBCV
Kompozisaun Tribunál	: Koletivu
Juis	: Dra. Sribuana da Costa, Dr. José António d. Escurial no Dra. Maria Modesta d. A. Viera
Prokuradór	: Dr. Bartolomeu de Araújo
Defeza	: Dr. Sidónio Maria Sarmiento

Desizaun

: Pena prizaun tinan 3 suspende ba tinan 3

Iha 10 Janeiro 2024, Tribunál Judisiál Primeira Instáncia Baukau prezide leitura akordaun ba kazu maus-tratus ba kónjuje no arma brankas ne'ebé envolve arguidu HdS hasoru nia feen, iha Munisípiu Baukau.

### **Akuzasaun Prokuradór**

Prokuradór akuza katak iha 24 Setembru 2021, iha oras tuku 20:00 kalan, arguidu basa dala ida iha lezada nia hasan parte karuk no kona mós lezada nia matan parte loos, rezulta bubu no metan iha lezada nia matan. Antes agresau ne'e, lezada husu osan ba arguidu atu loraon tuir mai lezada bele lori sira nia oan ba vasina iha sentru saúde, maibé arguidu lakohi fó osan, ho nune'e sira diskute malu no arguidu komete aktu ne'e hasoru lezada.

Tuir mai, iha 25 Setembru 2021, iha oras tuku 20:19 kalan, arguidu tuku dala ida iha lezada nia matan parte loos rezulta bubu no metan, hafoin arguidu foti katana no uza katana nia belar baka dala ida iha lezada nia ulun. Antes agresau ne'e, lezada dehan ba arguidu atu nono bee manas ba lezada atu haris, maibé arguidu lakohi, nune'e sira diskute malu no mosu agresau ne'e.

Antes ne'e, arguidu mós komete ona krime ofensa ba integridade física simples ho natureza VD hasoru lezada no ba kazu ne'e tribunál kondena ona arguidu ho pena multa.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(a) no 36 LKVD no kontra mós artigu 20(1), artigu 2(2 alinea f) Lei Arma Brankas.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklarata katak arrepende ninia hahalok. Arguidu mós hatutan katak di'ak malu ona ho lezada no la komete tan krime hasoru lezada.

Alende ne'e, lezada mós kontinua konfirma faktu hotu iha akuzasaun no deklarata katak depoisde akontesimentu ne'e, sira di'ak malu ona no to'o agora arguidu la komete tan krime hasoru lezada.

### **Alegasaun final**

Prokuradór haktuir katak arguidu nia aktu ne'e preense duni elementu hosi krime ne'ebé akuza ba arguidu, nune'e mezmua sira di'ak malu ona maibé husu ba tribunál atu kondena arguidu ho pena prizaun tinan rua suspende ba tinan rua.

Entretantu defeza haktuir katak iha julgamentu arguidu konfesa faktu hotu iha akuzasaun, arrepende ninia hahalok, di'ak malu ona ho lezada no depoisde akontesimentu ne'e la komete ona krime hasoru lezada, tanba ne'e husu ba tribunál atu kondena arguidu tuir konviksaun tribunál nian.

### **Desizaun**

Depoisde avalia faktu sira hotu, tribunál prova katak arguidu basa dala ida iha lezada nia hasan parte karuk no kona mós iha lezada nia matan parte loos, rezulta

matan bubu no metan. Tribunál mós prova katak arguidu tuku dala ida iha lezada nia matan parte loos rezulta bubu no metan, hafoin arguidu uza katana nia belar baku dala ida iha lezada nia ulun.

Bazeia ba faktu provadu sira ne'e no tetu mós sirkunstánsia agravante sira hanesan arguidu la'os foin primeiravés mai hatan iha tribunál, antes ne'e arguidu mai hatan ona iha tribunál ba kazu ofensa ba integridade física simples ho natureza VD no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no depoisde akontesimentu la komete tan krime seluk hasoru lezada, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

#### **4. Krime violasaun seksuál**

Nú. Prosesu : 0021/21.BCEVN  
Kompozisaun Tribunál : Koletivu  
Juis : Dra. Sribuana Costa, Dr. João Ribeiro no Dr. José António d. Escurial  
Prokuradór : Dr. Ambrósio Rangel Freitas  
Defeza : Dr. Grigório M. L. de Lima  
Desizaun : Pena prizaun tinan 5

Iha 22 Janeiro 2024, Tribunál Judisiál Primeira Instánsia Baukau prezide julgamentu leitura akordaun ba krime violasaun seksual ne'ebé envolve arguidu AdC hasoru lezada LdC, iha Munisípiu Baukau.

#### **Akuzasaun Prokuradór**

Prokuradór akuza katak iha 23 Agostu 2022, lezada ba iha natar laran hodi hein nia karau, hafoin arguidu bolu no emidiata kaer lezada nia liman, kaer lezada nia orgaun sensitivu no dudu monu lezada ba rai no kolu lezada nia roupa. Maski lezada rejeita, maibé arguidu ho obriga halo relasaun seksuál ho lezada. Depoisde halo tiha relasaun seksuál, arguidu hateten ho liafuan ameasa ba lezada katak "*ó labele fó hatene ema ida, se ó fó hatene hau baku mate ó,*". Tanba ta'uk lezada la hateten ba ema ida no la halo keixa.

Tuir mai, iha 18 Setembru 2022, iha oras tuku 09:00 dadeer, iha fatin hanesan, arguidu bolu tan lezada no tanba ta'uk ho akontesimentu primeiru, nune'e lezada halai hosi arguidu no fó hatene akontesimentu ne'e ba lezada nia maun, hafoin sira ba hato'o keixa iha polísia.

Prokuradór akuza arguidu kontra artigu 172 KP kona-ba violasaun seksuál ho moldura penál tinan 5 to'o tinan 15.

#### **Produsaun ba prova sira**

Iha prosesu julgamentu, arguidu deklara katak ih anatar laran sira hahú sira nia relasaun namora iha 10 Agostu 2022, no iha loran ne'e kedas, lezada husu osan ba arguidu atu sosa ninia telemovel "*layar sentuh*" nune'e arguidu mós fó osan US\$10.00 ba lezada. Tuir mai, iha 15 Agostu 2022, iha fatin hanesan, arguidu ho lezada hasoru malu tan no lezada dehan ba arguidu katak osan la to'o hodi sosa telemovel nune'e arguidu fó tan osan US\$10.00 ba lezada. Iha 23 Agostu 2022, iha mós fatin hanesan, arguidu ho lezada hasoru malu tan no lezada nafatin dehan ba

arguidu katak osan sosa telemovel la to'o nune'e arguidu fó tan osan US\$10.00, hafoin ne'e sira tuur konverse no arguidu ko'alia ba lezada dehan "*hau hakarak hola ó*" no lezada mós hatan dehan "*hau mós hakarak maibé maun nia feen iha ne'e?*". Arguidu hatan fali dehan "*hau nia feen (iha) mós hakarak hau hola ó*". Ho nune'e, lezada mesak hasai nia rounpa hafoin arguidu ho lezada halo relasaun seksuál. Arguidu deklarata katak arguidu la obriga lezada.

Arguidu hatutan katak tuir mai, iha 18 Setembru 2022, nafatin iha natar laran refere, lezada husu tan osan ba arguidu maibé arguidu hatan katak osan laiha tanba selu hotu ona ba arguidu nia oan nia eskola. Lezada rona ida ne'e, lezada ba fó hatene nia maun katak arguidu halo violasaun seksuál hasoru lezada.

Entretantu lezada kontinua konfirma faktu sira iha akuzasaun no deklarata katak sira laiha relasaun namora.

### **Alegasaun finál**

Prokuradór haktuir katak arguidu provadu komete aktu ne'ebé konsta iha akuzasaun hasoru lezada, tanba lezada konfirma faktu sira iha akuzasaun no subliña katak sira laiha relasaun manora. Alende ne'e, prova mós hosi relatóriu médiku ne'ebé junta iha prosesu. Tanba ne'e, husu ba tribunál atu kondena arguidu ho pena prizaun tinan ualu.

Entretantu defeza haktuir katak arguidu deklarata katak sira iha relasaun namora no relasaun seksuál ne'ebé akontese ho konsentimentu ka laiha obrigasaun, nune'e mezmú lezada konfirma faktu sira iha akuzasaun, maibé defeza fiar liu ba deklarasaun arguidu nian, tanba ne'e husu ba tribunál atu absolve arguidu hosi prosesu ne'e.

### **Desizaun**

Depoisde avalia faktu sira hotu, tribunál prova katak arguidu provadu komete krime violasaun seksuál hasoru lezada, bazeia ba konfirmasaun lezada nian no relatóriu médiku. Bazeia ba faktu provadu sira ne'e no tetu mós ho sirkunstánsia hot-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan lima.

## **5. Krime omisídiu negligente**

Nú. Prosesu	: 0137/22.BCSTR
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. Júlio da Silva Correia
Defeza	: Dr. Sidónio Maria Sarmento
Desizaun	: Pena prizaun tinan 3 suspende ba tinan 3

Iha 23 Janeiru 2024, Tribunál Judisiál Primeira Intánsia Baukau prezide leitura sentensa ba krime omisídiu negligente ne'ebé envolve arguidu FSP hasoru vítima FF (matebian), iha Aldeia Haha, Suku Vemasse-Tasi, Postu Administrativu Vemasse, Munisípiu Baukau.

### **Akuzasaun Prokuradór**

Prokuradór akuza katak iha 29 Outubru 2022, iha oras tuku 08:00 dadeer, arguidu lori motor Honda Scoopy, ho Nú. Mátrikula 4832 TIs, viajen hosi Dili atu ba Lospalos-Iliomar. Iha dalan, arguidu halai ho velocidade ne'ebé maka'as no bainhira to'o iha área sukaer laran arguidu soke vítima rezulta vítima lakon vida (mate) iha fatin akontesimentu no arguidu mós monu ba rai rezulta arguidu nia kabaas parte karuk tohar.

Prokuradór akuza arguidu kontra artigu 140 KP kona-ba omisídiu negligente ho moldura penál to'o tinan 5 prizaun.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklara katak depoisde akontesimentu ne'e iha parte lokraik arguidu nia família ajuda kedas osan US\$2,000.00 ba vítima nia serimónia funerál no osan refere fó liuhosi vítima nia maun GC. Arguidu mós hatutan katak arguidu iha karta kondusaun hosi tinan 2012.

### **Alegasaun finál**

Prokuradór haktuir katak arguidu provadu komete krime ne'ebé konsta iha akuzasaun hasoru vítima tanba arguidu soke vítima to'o lakon vida. Tanba ne'e, husu ba tribunál atu kondena arguidu ba pena prizaun tinan tolu suspende ba tinan tolu.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa no depoisde akontesimentu ne'e arguidu nia família ajuda ona osan US\$2,000.00 ba serimónia funerál vítima nian.

### **Desizaun**

Depoisde avalia faktu sira hotu, tribunál prova katak arguidu kondús motor Honda Scoopy ho Nú. Mátrikula 4832 TIs, viajen hosi Dili atu ba Lospalos-Iliomar no soke vítima rezulta vítima lakon vida (mate) iha fatin akontesimentu. Arguidu nia família mós fó ona osan hamutuk US\$2,000.00 ba vítima nia seremónia funerál. Bazeia ba faktu provadu sira ne'e no tetu mós sirkunstánsia hot-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

### **6. Krime omisídiu negligente**

Nú. Prosesu	: 0356/23.BCSTR
Kompozisaun Tribunál	: Singulár
Juis	: Dr. José António d. Escurial
Prokuradóra	: Dra. Remizia de Fátima da Silva
Defeza	: Dr. Sidónio Maria Sarmento
Desizaun	: Pena prizaun tinan 3 suspende ba tinan 3

Iha 23 Janeiro 2024, Tribunál Judisiál Primeira Intánsia Baukau prezide julgamentu leitura sentensa ba krime omisídiu negligente ne'ebé envolve arguidu JdC hasoru vítima VdC (matebian), iha Suku Tirilolo, Postu Administrativu Baukau Vila, Munisípiu Baukau.



### **Akuzasaun Prokuradór**

Prokuradór akuza katak iha 04 Maiu 2023, iha oras tuku 07:30 dadeer, arguidu kondús mikrolet ka bemo ho Nú. Mátrikula 36557 TIs, halai ho velocidade kilometru 40. Arguidu halai hosi parte liman karuk depois haree vítima korta dalan hosi parte karuk atu ba parte loos. Arguidu halai atu ses hosi vítima, maibé la konsege ses, nune'e kareta nia oin parte karuk soke vítima rezulta vítima monu iha alkatraun leten ho kondisaun grave. Arguidu tun hosi kareta no tula vítima ba Ospital Rejionál Baukau, maibé tanba vítima kondisaun grave, kontinua transfere vítima ba iha Ospital Nasionál Guido Valdares Dili, maibé la konsege salva vítima nia vida (hakotu iis).

Prokuradór akuza arguidu kontra artigu 140 KP kona-ba omisídiu negligente ho moldura penál to'o tinan 5 prizaun.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklara katak arguidu fó ona osan US\$2,000.00 ba iha vítima nia serimónia funerál, fó mós osan US\$200.00 ba ai-funan loron 40 nian no fó mós osan US\$100.00 ba ai-funan fulan neen nian ho bibi ida. Alende ne'e, arguidu hatutan katak sei ajuda tan vítima nia serimónia koremetan tinan ida nian. Liután arguidu deklara katak nia hahú kondús kareta iha tinan 2017 no iha karta kodusaun ne'ebé sei válidu to'o agora.

Entretantu, testemuña FdS nu'udar vítima nia maun depoimenta katak kazu ne'e rezolve ona tuir família no arguidu ajuda duni osan ho montante ne'ebé arguidu temi no tuir akordu arguidu ho nia família mós sei ajuda tan bainhira atu halo vítima nia serimónia koremetan tinan ida nian.

### **Alegasaun final**

Prokuradór haktuir katak arguidu provadu komete omisídiu negligente bazeia ba konfisaun arguidu nian. Alende ne'e, depoisde akontesimentu ne'e arguidu ajuda ona lezadu nia serimónia funerál hanesan osan, animál no sei ajuda tan iha serimónia koremetan. Tanba ne'e, husu ba tribunál atu fó pena ne'ebé justu ba arguidu.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa no depoisde akontesimentu ne'e arguidu ajuda ona vítima nia serimónia funerál hanesan osan, animál no sei ajuda tan iha serimónia koremetan.

### **Desizaun**

Depoisde avalia faktu sira hotu, tribunál prova katak arguidu kondús Mikrolet ho Nú. Mátrikula 36557 TIs, halai ho velocidade kilometru 40. Arguidu halai hosi parte liman karuk no haree vítima korta dalan hosi parte karuk atu ba parte loos. Arguidu halai atu ses hosi vítima, maibé la konsege ses, nune'e kareta nia oin parte karuk soke vítima rezulta vítima monu iha alkatraun leten ho kondisaun grave. Arguidu tula vítima ba Ospital Rejionál Baukau no kontinua transfere ba Ospital Nasionál Guido Valdares Dili, maibé la konsege salva vítima nia vida. Arguidu ajuda ona vítima nia serimónia funerál hanesan osan, animál no sei ajuda tan iha serimónia koremetan.

Bazeia ba faktu provadu sira ne'e no tetu mós sirkunstánsia hot-hotu ne'ebé haleu krime ne'e, tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

## **7. Krime maus-tratus ba kónjuje**

Nú. Prosesu : 0005/22.VQOSU  
Kompozisaun Tribunál : Koletivu  
Juis : Dra. Maria Modesta d. A. Viera no Dr. José António  
d. Escurial no Dra. Sribuana da costa  
Prokuradór : Dr. Ambrósio Rangel Freitas  
Defeza : Dr. Sidónio Maria Sarmiento  
Dezisaun : Pena prizaun tinan 2 suspende ba tinan 2

Iha 25 Janeiro 2024, Tribunál Judisiál Primeira Instánsia Baukau prezide leitura akordaun ba krime maus-tratus ba kónjuje ne'ebé envolve arguidu NdS hasoru nia feen, iha Munisípiu Vikeke.

### **Akuzasaun Prokuradór**

Prokuradór akuza katak iha 28 Janeiro 2022, iha oras tuku 19:00 kalan, arguidu tuku dala hitu iha lezada nia ulun, tuku dala haat iha lezada nia kotuk laran no tuku dala ida iha lezada nia susun parte loos. Alende ne'e, arguidu tebe dala tolu iha lezada nia kabun, kanotak no foti tan ai-sanak ida baku dala barak iha lezada nia ain kabun parte loos no karuk. Antes agresauun ne'e, arguidu ho lezada diskute malu kona-ba arguidu deskonfia lezada iha relasaun domin ho mane seluk.

Antes ne'e, iha laron no fulan ne'ebé lezada haluha ona maibé iha tinan 2017, arguidu tuku dala barak iha lezada nia kotuk no tebe dala ida iha lezada nia kidun no kotuk laran. Alende ne'e, iha laron no fulan ne'ebé lezada haluha mós maibé iha tinan 2018, arguidu tebe dala barak iha lezada nia kotuk laran. Nune'e mós, iha laron no fulan ne'ebé lezada haluha maibé iha tinan 2019, arguidu tuku dala barak iha lezada nia kotuk laran no basa dala ida iha lezada nia hasan. Tuir mai iha tinan 2020 (lezada haluha laron no fulan), arguidu tuku lezada nia ulun no kotuk laran. Iha tinan 2021 (lezada haluha laron no fulan), arguidu tuku no tebe dala barak iha lezada nia kotuk laran.

Antes agresauun hirak ne'e, arguidu deskonfia lezada iha relasaun domin ho mane seluk, nune'e sira sempre diskute malu no mosu agresauun hirak ne'e.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(a) no 36 LKVD.

### **Produsaun ba prova sira**

Iha prosesu julgamentu, arguidu rejeita faktu sira hosi tinan 2017 to'o 2021 maibé konfesa faktu ne'ebé akontese iha tinan 2022, katak arguidu halo duni agresauun hasoru lezada. Arguidu mós deklara katak iha momentu halo agresauun hasoru lezada ne'e tanba lezada dulas arguidu nia orgaun sensitivu rezulta moras no foti tan ai-balok ida baku dala ida iha arguidu nia ulun no ambulánsia mak tula arguidu ba baixa iha ospitál durante laron haat mak foin alta. Alende ne'e, arguidu hatutan tan katak arguidu husu ona deskulpa ba lezada perante família rua, fó karau ida, kuda

ida no bibi ida ba lezada nia família, agora dadaun sira moris hamutuk nafatin no arguidu la komete ona krime hasoru lezada.

Enkuantu, lezada kontinua konfirma faktu sira hotu iha akuzasaun no konfirma mós ho arguidu nia deklarasaun katak iha akontesimentu ne'e lezada mós halo agresaun hasoru arguidu to'o baixa iha ospital durante loron haat no depoisde arguidu alta hosi ospital sira rezolve ona problema ne'e no arguidu fó sasan sira hanesan temi ona iha arguidu nia deklarasaun.

### **Alegasaun final**

Prokurador haktuir katak arguidu konfesa parsialmente maibe lezada kontinua konfirma akuzasaun katak tinan-tinan arguidu sempre halo agresaun hasoru lezada. Nune'e, konsidera arguidu nia konduta ne'e prenze krime ne'ebé inputa ba nia. Tanba ne'e, husu ba tribunal atu kodena arguidu ho pena prizaun tinan rua suspende ba tinan rua.

Entretantu, defeza haktuir katak arguidu deklarade'it faktu ne'ebé nia komete, mezmuz lezada konfirma faktu hotu iha akuzasaun, maibe arguidu mós deklarade'it katak iha momentu ne'ebá lezada mós komete krime hasoru arguidu to'o arguidu baixa iha ospital no konfirma mós hosi lezada, maibe tanba sira di'ak malu ona no problema ne'e sira rezolve ona, nune'e husu ba tribunal atu kondena arguidu ho pena ne'ebé kmaan.

### **Desizaun**

Depoisde avalia faktu sira, tribunal konsidera faktu sira hotu iha akuzasaun provadu, mezmuz arguidu koko atu nega faktu balun, maibe lezada kontinua konfirma.

Bazeia ba faktu provadu sira ne'e no tetu mós ho sirkunstansia hot-hotu ne'ebé haleu krime ne'e, nune'e tribunal konklui prosesu ne'e no kondena arguidu ho pena prizaun tinan rua suspende ba tinan rua.

## **8. Krime ofensa ba integridade física simples ho natureza violência doméstica**

Nú. Prosesu	: 0036/23.VQVQQ
Kompozisaun Tribunal	: Singulár
Juis	: Dr. José António d. Escurial
Prokurador	: Dr. Julio da Silva Correia
Defeza	: Dra. Laura Valente Lay
Desizaun	: Pena multa US\$30.00

Iha 26 Janeiro 2024, Tribunal Judisial Primeira Instancia Baukau prezide leitura sentensa ba krime ofensa ba integridade física simples ho natureza VD ne'ebé envolve arguidu HS hasoru nia feen, iha Munisipiu Vikeke.

### **Akuzasaun Prokurador**

Prokurador akuza katak iha 01 Juñu 2021, iha oras tuku 15:00 lokraik, arguidu lori kadeira masa ida no tuda dala ida iha lezada niaibun, hafoin arguidu basa dala ida iha lezada nia hasan parte loos no buti lezada nia kakorok. Antes agresaun ne'e, sira nia oan tanis nune'e arguidu ho lezada diskute malu no mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklara katak arrepende ninia hahalok. Arguidu mós hatutan katak depoisde akontesimentu ne'e lezada halai ba hela hamutuk tiha ho nia família no liu semana ida mak arguidu ba tuir lezada hodi rezolve problema ne'e tuir kultura Timor nian nune'e sira dame malu ona no moris hamutuk nafatin hanesan feen ho la'en. Liután arguidu hatutan katak sira forma família dezde tinan 2018 no foin primeiravés mai hatan iha tribunál.

Alende ne'e, lezada kontinua konfirma faktu hotu iha akuzasaun no deklara katak sira di'ak malu ona no kazu ne'e sira rezolve ona tuir kultura Timor nian no to'o agora arguidu la komete tan krime hasoru lezada.

### **Alegasaun finál**

Prokuradór haktuir katak arguidu provadu komete aktu ne'ebé konsta iha akuzasaun hasoru lezada, ho nune'e atu prevene krime ne'e akontese tan iha futuro, husu ba tribunál atu kondena arguidu ho pena prizaun fulan tolu suspende ba tinan ida.

Entretantu defeza haktuir katak arguidu konfesa faktu hotu iha akuzasaun, arrepende ninia hahalok no foin primeiravés mai hatan iha tribunál, tanba ne'e husu ba tribunál atu aplika pena admoestasaun ba arguidu.

### **Desizaun**

Depoisde avalia faktu sira hotu, tribunál prova katak arguidu lori kadeira masa ida no tuda dala ida iha lezada nia ibun, hafoin arguidu basa dala ida iha lezada nia hasan parte loos no buti lezada nia kakorok.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, dame malu ona liuhosi kultura Timor nian no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$30.00, ne'ebé arguidu sei selu US\$1.00 kada lora durante lora 30. Tribunál mós fiksa pena alternativa durante lora 20 prizaun, bainhira arguidu la kumpri pena multa refere.

### **9. Krime ofensa ba integridade física simples ho natureza violénsia doméstika**

Nú. Prosesu	: 0005/23.VQVQQ
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. Julio da Silva Correia
Defeza	: Dra. Laura Valente Lay
Desizaun	: Pena multa US\$90.00

Iha 26 Janeiro 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade física simples ho natureza VD ne'ebé envolve arguidu HP hasoru nia feen, iha Munisípiu Vikeke.

### **Akuzasaun Prokuradór**

Prokuradór akuza katak iha 15 Feveireiru 2022, iha oras tuku 06:00 dadeer, arguidu lori ai-teka sanak ida baku dala rua iha lezada nia kanotak parte karuk, baku dala ida iha lezada nia ain parte karuk no baku dala ida iha lezada nia ain parte loos. Arguidu mós kontinua lori ai-sanak refere baku dala rua iha lezada nia liman kabun parte karuk no baku dala haat iha lezada nia reen-toos. Antes agresaun ne'e, arguidu ho lezada diskute malu kona-ba kalan lezada la toba iha uma.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa, konjuga ho artigu 2, 3(a), 3(b) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklarata katak arrepende ninia hahalok. Arguidu mós deklarata katak depoisde akontesimentu ne'e lezada halai ba hela hamutuk ho nia família, maibé liu semana rua arguidu ba tuir lezada hodi sira rezolve problema ne'e tuir kultura Timor nian. Arguidu hatutan katak sira forma família iha tinan 1997 no foin primeiravés mai hatan iha tribunál.

Alende ne'e, lezada kontinua konfirma faktu sira iha akuzasaun no hatutan katak sira nia oan lori motor sai no kalan bo'ot ona seidauk fila no lezada mak fó xave motor ba sira nia oan, nune'e lezada ta'uk arguidu hirus nune'e ba toba tiha iha nia alin nia uma.

### **Alegasaun finál**

Prokuradór konsidera arguidu provadu komete krime hasoru lezada bazeia ba konfisaun arguidu nian no konfirmasaun hosi lezada ba faktu sira iha akuzasaun, nune'e atu prevene arguidu repete ninia aktu ne'e iha futuro, husu ba tribunál atu kondena arguidu ho pena prizaun tinan rua suspende ba tinan rua.

Entretantu, defeza husu ba tribunál atu kondena arguidu ho pena ne'ebé justu ho konsiderasaun katak arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada.

### **Desizaun**

Depoisde avalia faktu sira hotu, tribunál prova katak arguidu lori ai-teka sanak ida baku dala rua iha lezada nia kanotak parte karuk, baku dala ida iha lezada nia ain parte karuk no baku dala ida iha lezada nia ain parte loos. Tribunál mós prova katak arguidu kontinua lori ai-sanak refere baku dala rua iha lezada nia liman kabun parte karuk no baku dala haat iha lezada nia reen-toos.

Bazeia ba faktu provadu hirak ne'e no tetu mós sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$90.00, ne'ebé arguidu sei selu US\$1.00 kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

## **10. Krime obstrusaun ba autoridade pública**

Nú. Prosesu : 0001/23.BCSIC

Kompozisaun Tribunál : Koletivu

Juis : Dra. Maria Modesta, Dr. José António d. Escorial no  
Dra. Sribuana da Costa  
Prokuradór : Dr. Bartolomeu de Araújo  
Defeza : Dr. Sidónio Maria Sarmiento  
Desizaun : Pena prizaun tinan 2 suspende ba tinan 2

Iha 30 Janeiro 2024, Tribunál Judisiál Primeira Instánsia Baukau prezide leitura akordaun ba kazu obstrusaun ba autoridade públika ne'ebé envolve arguidu AM hasoru Bee Timor Leste (BTL) Impresa Públika, iha Aldeia Lutu-Mutu, Suku Trilolo, Postu Administrativu Baukau Vila, Munisípiu Baukau.

### **Akuzasaun Prokuradór**

Prokuradór akuza katak iha 16 Janeiro 2023, maizumenus iha oras tuku 16:53 lokraik, funsionáriu BTL kontrola hela bee, tanba comunidade balun hasai bee hosi kanalizasaun direita. Derrepente arguidu sai hosi uma laran, foti fatuk no tuda funsionáriu BTL ne'ebé kontrola hela bee refere. Arguidu tuda kona JX nia liman rezulta kanek no bainhira arguidu atu tuda tan RdC mak polisia hosi Komandu PNTL Munisípiu Baukau, tun hodi asegura arguidu no lori ba halo identifikasaun no funsionáriu sira ne'e mós para kedas sira nia serbisu.

Prokuradór akuza arguidu kontra artigu 243 KP kona-ba krime obstrusaun autoridade públika ho moldura penál tinan 2 to'o tinan 6.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklarasaun katak momentu ne'ebá arguidu ho kondisaun lanu no toba hela iha uma laran no arguidu rona labarik sira hakilar dehan "*apa ema tesi kanu,*" nune'e arguidu hakfodak no sai hosi uma laran hodi foti fatuk tuda Ekipa BTL ne'ebé kontrola hela bee iha fatin refere.

Depoisde rona deklarasaun hosi arguidu, prokuradór husu ba tribunál atu presinde tiha depoimentu hosi funsionáriu na'in rua ne'ebé arola nu'udar testemuña ho konsiderasaun katak arguidu konfesa faktu hotu iha akuzasaun nune'e prova suficiente ona. Relasiona ho pedidu ne'e, defeza laiha opozisaun no tribunál mós konklui hodi presinde depoimentu testemuña sira nian.

### **Alegasaun finál**

Prokuradór konsidera arguidu provadu komete krime ne'ebé akuza ba arguidu bazeia ba konfisaun arguidu nian, nune'e husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa no iha akontesimentu ne'e arguidu mós ho kondisaun lanu.

### **Desizaun**

Depoisde avalia faktu sira hotu, tribunál prova katak arguidu halo impedimentu ba ekipa BTL ne'ebé halo hela sira nia serbisu liuhosi tuda kona JX nia liman rezulta

kanek. Bazeia ba faktu provadu sira ne'e no tetu mós ho sirkunstánsia hot-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

### **11. Krime ofensa ba integridade fizika simples ho natureza violénsia doméstika**

Nú. Prosesu : 0195/22.BCBCV  
Kompozisaun Tribunál : Singulár  
Juis : Dr. José António d. Escurial  
Prokuradór : Dr. Bartolomeu de Araújo  
Defeza : Dr. Sidónio Maria Sarmiento  
Desizaun : Pena multa US\$30.00

Iha 30 Janeiro 2024, Tribunál Judisiál Primeira Instánsia Baukau prezide leitura sentensa ba krime ofensa ba integridade fizika simples ho natureza VD ne'ebé envolve arguidu JMS hasoru nia feen, iha Munisípiu Baukau.

#### **Akusasaun Prokuradór**

Prokuradór akuza katak iha 20 Dezembru 2022, iha oras tuku 13:00 meiodia, arguidu tuku dala ida iha lezada nia reen-toos, buti lezada nia kakorok no tuku dala ida iha lezada niaibun rezulta kanek ki'ik no raan. Antes agresaun ne'e, lezada fó hatene ba arguidu katak lezada nia alin feto atu fila ba Uatu-lari no arguidu dehan ba lezada atu ba hamutuk ho lezada nia alin ne'e, maibé lezada lakohi ba ho kondisaun udan ho anin mós bo'ot tanba sira nia oan sei ki'ik (foin halo fulan haat), maibé arguidu nafatin obriga lezada atu ba hamutuk ho lezada nia alin. Ho nune'e, lezada mós tama ba uma laran hodi halot oan nia roupa atu ba hamutuk ho lezada nia alin, maibé arguidu tama tuir lezada iha uma laran atu hadau sira nia oan, maibé lezada la fó, nune'e sira diskute malu no mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

#### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklara katak depoisde akontesimentu ne'e lezada ba hela tiha iha Uma-Mahon durante semana ida resin no fila hosi Uma-Mahon arguidu simu nafatin nu'udar nia feen no kontinua moris hamutuk. Arguidu mós hatutan katak la baku ona lezada, forma família dezde tinan 2019 no foin primeiravés mai hatan iha tribunál.

Alende ne'e, lezada mós kontinua konfirma faktu hotu iha akuzasaun no deklara katak depoisde fila hosi Uma-Mahon sira di'ak malu ona to'o agora no arguidu la baku ona lezada.

#### **Alegasaun final**

Prokuradór konsidera arguidu provadu komete krime hasoru lezada bazeia ba konfisaun arguidu nian no konfirmasaun lezada nian ba iha faktu sira iha akuzasaun, nune'e atu prevene arguidu komete tan aktu ne'e iha futuro hasoru lezada, husu ba tribunál atu kondena arguidu ba pena prizaun fulan ida suspende ba tinan ida.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak, arguidu konfesa, di'ak malu ona ho lezada no foin primeiravés mai hatan iha tribunál.

### **Desizaun**

Depoisde avalia faktu sira hotu, tribunál prova katak arguidu tuku dala ida iha lezada nia reen-toos, buti lezada nia kakorok no tuku dala ida iha lezada niaibun rezulta kanek ki'ik no raan. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$30.00, ne'ebé arguidu sei selu US\$1.00 kada loron durante loron 30. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

### **12. Krime uza dokumentu ba identifikasaun alleiu no falsifikasaun ba dokumentu ka notasaun téknika**

Nú. Prosesu	: 0013/23.LASIC
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Bartolomeu de Araújo
Defeza	: Dr. Sidónio Maria Sarmiento
Desizaun	: Pena multa US\$30.00

Iha 30 Janeiro 2024, Tribunál Judicial Primeira Instánsia Baukau prezide julgamentu leitura sentensa ba krime uza dokumentu ba identifikasaun alleiu no falsifikasaun ba dokumentu ka notasaun téknika ne'ebé envolve arguida MdC hasoru Estadu RDTL liuhosi Ministériu Administrasaun Estatál, iha Munisípiu Lautein.

### **Akuzasaun Prokuradór**

Prokuradór akuza katak iha 03 Fevereiro 2020, iha oras tuku 08:00 dadeer, arguida lori FdC nia sertidaun batizmu ba STAE Munisípiu Lautein hodi emite nia kartaun eleitorál no bazeia ba dokumentu ne'ebé arguida apresenta, STAE prodús kartaun eleitorál arguida nian. Iha tempu tuir mai, bainhira FdC lori nia sertidaun ba trata nia kartaun eleitorál, STAE informa ba FdC katak labele admite ona tanba naran ne'ebé hanesan iha ona. Ho nune'e, FdC husu ba parte STAE atu verifika iha baze dados, no haree iha dados refere arguida nia fotografia mak sai no uza naran FdC nian. FdC mós informa ba parte STAE katak arguida nu'udar nia prima no arguida nia naran ne'e la'os FdC, maibé MdC.

Prokuradór akuza arguida kontra artigu 306 KP kona-ba uza dokumentu ba identifikasaun alleiu ho moldura penál to'o tinan 1 ka multa no kontra artigu 35 (1) KP kona-ba konkursu krime no kontra mós artigu 303 (1) KP kona-ba falsifikasaun ba dokumentu ka notasaun téknika ho moldura penál to'o tinan 3 ka multa.

### **Produsaun ba prova sira**

Iha prosesu julgamentu, arguida konfesa faktu hotu iha akuzasaun no deklara katak iha momentu ne'ebá arguida nia sertidaun batizmu seidak sai tanba ne'e mak uza fali nia prima FdC nian maibé nia husu ona deskulpa ba FdC.



Depoisde rona deklarasaun hosi arguida, prokuradór husu ba tribunál atu presinde tiha depoimentu testemuña nian (FdC) ho konsiderasaun katak arguida konfesa faktu hotu iha akuzasaun, nune'e prova suficiente ona. Relasiona ho pedidu ne'e, defeza laiha opozisaun, nune'e tribunál konklui hodi presinde depoimentu testemuña nian.

### **Alegasaun final**

Prokuradór haktuir katak arguida konfesa integralmente ba faktu hotu iha akuzasaun no husu ona deskulpa ba nia prima FdC, nune'e konsidera faktu sira iha akuzasaun provadu hotu no husu ba tribunál atu kondena arguida ho pena prizaun fulan neen suspende ba tinan ida.

Entretantu, defeza husu ba tribunál atu kondena arguida ho pena ne'ebé kmaan ho konsiderasaun katak arguida konfesa no husu ona deskulpa ba FdC.

### **Desizaun**

Depoisde avalia faktu sira hotu, tribunál prova katak arguida uza FdC ninia sertidaun batizmu hodi halo nia kartaun eleitorál iha STAE, Munisípiu Lautein, nune'e bainhira FdC lori nia sertidaun ba trata nia kartaun eleitorál, parte STAE la simu tanba naran hanesan iha ona.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, tribunál konklui prosesu ne'e no kondena arguida ho pena multa US\$30.00, ne'ebé arguida sei selu sentavus US\$0.50 kada loron durante loron 60. Tribunál mós fiksa pena alternativa durante loron 40 prizaun, bainhira arguida la kumpri pena multa refere.

### **13. Krime danu simples**

Nú. Prosesu	: 0187/22.BCBCV
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Bartolomeu de Araújo
Defeza	: Dra. Laura Valente Lay
Desizaun	: Pena multa US\$60.00

Iha 30 Janeiro 2024, Tribunál Judisiál Primeira Instánsia Baukau prezide leitura sentensa ba krime danu simples ne'ebé envolve arguidu DdS (editál) hasoru lezadu AE, iha Suku Bukoli, Postu Administrativu Baukau Vila, Munisípiu Baukau.

### **Akusasaun Prokuradór**

Prokuradór akuza katak iha 14 Dezembru 2022, iha oras tuku 18:00 lokraik, arguidu sobu, tuu kuak no halo estraga lezadu nia kalen hamutuk tahan 20. Kada kalen ho folin US\$3.50, nune'e kalen 20 ho total osan hamutuk US\$70.00. Arguidu mós estraga lezadu nia au lolon ida ho folin US\$10.00. Total prejuizu hamutuk US\$80.00.

Prokuradór akuza arguidu kontra artigu 258 (1) KP kona-ba danu simples ho moldura penál to'o tinan 3 ka multa.

### **Produsaun ba prova sira**

Iha prosesu julgamentu, tribunál labele rona arguidu nia deklarasaun tanba arguidu editál. Enkuantu, lezadu kontinua konfirma faktu sira iha akuzasaun no deklarasaun katak seidak di'ak malu ho arguidu, nune'e husu ba tribunál atu kondena arguidu atu selu ninia sasan ne'ebé arguidu estraga ona tuir valor ne'ebé sita iha akuzasaun.

### **Alegasaun finál**

Prokuradór haktuir katak mezmú arguidu editál maibé lezadu kontinua konfirma faktu sira iha akuzasaun. Tanba ne'e, husu ba tribunál atu kondena arguidu ho pena prizaun fulan rua suspende ba tinan ida.

Entretantu defeza husu ba tribunál atu kondena arguidu ho pena ne'ebé adekuadu.

### **Desizaun**

Depoizde avalia faktu sira hotu, tribunál prova katak arguidu sobu, tuu kuak no halo estraga lezadu nia kalen hamutuk tahan 20 ho folin US\$70.00, kada kalen ho folin US\$3.50. Tribunál mós prova katak arguidu estraga lezadu nia au lolon ida ho folin US\$10.00. Ho nune'e, total prejuizu hamutuk US\$80.00.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, tribunál konklui prosesu ne'e no kondena arguidu ho pena multa US\$60.00, ne'ebé arguidu sei selu US\$60.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

### **Atu hetan informasaun liutan favór kontaktu:**

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: [ana@jsmp.tl](mailto:ana@jsmp.tl)

[info@jsmp.tl](mailto:info@jsmp.tl)

Website: <http://jsmp.tl>